


La'o Hamutuk

Instituto Timor-Leste ba Analiza no Monitor Rekonstruksaun
Timor-Leste Institute for Reconstruction Monitoring and Analysis
1/1a Rua Mozambique, Farol, (P.O. Box 340) Dili, Timor-Leste
Tel: +670-3325013 or +670-7234330
email: info@laohamutuk.org
Web: <http://www.laohamutuk.org>



Submisaun ba
Ministeriu Rekursu Naturais, Minerais no
Politika Enerjetika
Republika Demokratika De Timor Leste

Husi
La'o Hamutuk

Kona ba
Pakote Legislativu relasiona ho Reorganiza
Aktividade Industria Petroliferu iha Timor-Leste

5 Abril 2007

Sumariu

- Submisaun ne'e diskute ideia jerais deit tamba tempu ne'ebe badak atu hato'o analiza ida ne'ebe detalladu.
- Tempu, hanesan ita hatene, lingua no media ne'ebe uza ba konsultasaun publiku ne'e halo imposivel atu hetan sujestaun ne'ebe importante hosi populasaun Timor no konsultasaun tenki hanaruk ka loke fila fali.
- Lijislasaun mayor labele sai hanesan lei durante krize sosial no politika ka molok eleisoens nasional atu hahu. Laiha razaun ba dekretu ne'e atu pasa liu dalan ida ne'ebe lais la halimar.
- Esbosu lei ne'e prioritiza liu osan hanesan "ajentes ekonomiku" liu fali nesesidade no direitu ba ita nia populasaun, no fó benefisiu ba emprezarial no povu iha nasaun sira ne'ebe riku liu fali sidadaun Timor-Leste.
- Se fó sai nudar lei, esbosu lei ne'e sei estraga ita nia meiu ambiente no deskorazen Timor-Leste husi esplorasau ba opsaun ba enerzia ida ne'e mos no renovavel.
- Esbosu lei ne'e exsesivamente konsentra poder iha ministeru ida, tamba ne'e iha risku ba korupsiun, abuzu ba poder no mal administrasaun.
- Esbosu lei ne'e totalmente falha atu implementa governu nia komitmentu ba transparansia no akuntabilidade, no bele la fó importansia ba pasus ne'ebe eziste tiha ona tuir prinsipiu hirak ne'e.
- Esbosu lei ne'e fó dalan ba konfliktu de interese no kuaze laiha garante hasoru korupsiun.
- ANRP viola kondisaun hosi Lei Fundu Petroliferu nian katak rendimentu hotu-hotu husi atividade petroliferu depozita direktamente ba Fundu Petroliferu.
- Kompania mina nasional fó risku hanesan mos benefisiu; estatuta PETROTIL ne'ebe propoen la proteze hasoru perigus.

Introdusaun

Nudar Organizaasaun Nao Governamental (ONG) Timor-Leste ida, *La'ó Hamutuk* agradese ba oportunidade konsultasaun publiku ne'ebe Ministerio fó. Proposta lejislasaun ne'e esensial ba futuru ita nia nasaun. Iha pontu ba prosesu ne'e, importante ba governu atu rona opiniaun publiku no enkorazen partisipasaun publiku. Ne'e hanesan momentu importante ida atu hetan opinioens publiko nian no hanesan meios ida importante atu encoraja partisipasaun publiku iha prosesu dezenvolve Timor-Leste nudar nasaun demokratiku. Tamba ne'e, konsultasaun publiku la'os hala'ó deit hodi tuir kondisaun legal ninian, maibe efetivamente estimula no komprende hanoin povu hosi ita nia nasaun tomak, no sinteza sujestaun hirak ne'e hosi variedade perspetiva no baze konhesimentu.

La'ó Hamutuk servisu iha tinan barak ona relasiona ho dezenvolvimentu rekursu naturais iha Timor-Leste hamutuk ho organizaasaun seluk. *La'ó Hamutuk* hato'ó ona submisaun barak ba Governu no Parlemtu, partikularmente relasiona ho lei ne'ebe estabese ita nia rezime petroliferu no fundu petroliferu. Ita halo tiha ona kampanha atu hari apoiu ba Governu Timor-Leste iha negosiasaun ho Australia kona ba Tasi Timor. Iha tinan hitu nia laran, ita dezenvolve relasaun ho peritus iha mundu tomak ne'ebe fó sira nia matenek hodi apoiu Timor-Leste atu dezenvolve sistema ho klase mundu atu maneza dezenvolvimentu petroliferu no rendimentu.

Ami hakarak kontinua apoiu Governu Timor-Leste no lejisladores hodi kria sistema atividade petroliferu ne'ebe bele garante katak rekursu petroliferu Timor-Leste fó benefisiu ba ita nia populasaun, se lae fó fali todan "malisan rekursu" ne'ebe kondena riku-mina barak, nasaun kiak hanesan ita iha area ekonomia, meu ambiente no dizastre sosial.

Tamba ne'e, ami hakarak uza oportunidade ne'e hodi hato'ó ami nia perspetiva, no komentario ruma kona ba esbosu lei relasiona ho atividade petroliferu nian iha Timor-Leste hodi responde avizu ne'ebe publika iha loron 22, fulan ne'e. Ami laiha tempu naton atu fó komentariu ba artigu kada artigu hanesan buat ne'ebe ami halo uluk. Tamba ne'e, ami responde ba konsultasaun ne'e hanesan konsultasaun publiku kona ba fundu petroliferu ba dala uluk liu husi papel diskusaun, no fó komentariu jeral ba konseitu baziku.

Ami hatene katak iha ema barak hosi sosiedade sivil no iha fatin seluk husu atu iha tempu tan ba konsultasaun publiku ne'e. Se Ministru rona ba hahusuk no estende ka loke fila fali prosesu ne'e, *La'ó Hamutuk* sei fó sujestoens detalhadu no informasaun diak liu.

Konsultasaun publiku ne'e badak liu no dezenha atu diskorazen partisipasaun popular.

Iha prinsipiu, ami la kestiona kona ba poder Governu nian atu halo lei ka regulamentu ruma iha Timor-Leste. Hanesan Governu ne'ebe forma liu hosi prosesu demokratiku, Governu iha poder legal atu halo lei ka regulamentu ruma lori regula aktividade dezenvolvimentu tomak iha Timor-Leste, inklui dezenvolvimentu iha setor Petroliferu.

Hanesan nasaun demokratiku, Konsultasaun Publiku nudar dalan importante tebes atu povu bele partisipa iha prosesu dezvoltamentu, ajuda atu kria lei ne'ebe iha impaktu ba sidadaun tomak. Direitu ba partisipasaun publiku preve tiha ona iha konstituisaun RDTL, nudar komponente nesessariu husi artigu 46.1: "Sidadaun ida-idak iha direitu atu partisipa iha vida politika no iha asuntu publikus nasaun nian, indiretu ka liu husi reprezetantes ne'ebe eleitu demokratikamente."

Konsultasaun publiku tenki sai nudar mekanismu ida atu enkorazen povu atu partisipa iha prosesu, la'os komunikaun husi Governu deit. Governu bele aprende ideias alternativa atu hadiak sira nia leis no desizoens. Ami hein katak governu la haree prosesu konsultasaun publiku sai hanesan ezersisiu atu hetan kondisaun legal nian deit, maibe ita bele konduta ho intensaun diak, nudar dalan ida atu implementa espiritu no letra demokrasia ninian.

Iha prosesu konsulta publiku ninian, Ministerio hanesan la interese atu hetan input husi sosiedade sivil iha Timor-Leste no fatin sira seluk. Governu anunsia iha loron 22 Marsu no fó deit tempu loron 15 ba komentariu. Maski esbosu lei ne'e balun iha tiha ona fulan lima liu ba, maibe lei hirak ne'e la fó sai ba publiku atu fó hanoin to'ó loron 15 molok *deadline*. Dokumentus sira seluk indika katak planu governu atu implementa autoridade regulatoriu foun iha loron 1 de Abril, ka iha dekretu lei promulga husi Presidenti Xanana Gusmao, ne'ebe nia mandatu sei hotu la to'ó fulan rua nia laran. Ami fiar katak balun involve iha prosesu ne'e haree nudar formalidade deit hanesan konselleiru governu ida hakerek, la'os tenki "desnesessariu impoen ka indesijavel tarde" atu hodi proposta lejislasaun iha kbiit lais liu tuir buat ne'ebe ita hakarak.

La'ó Hamutuk nudar organizesaun lokal ho esperiensa, rekursus, matenek ne'ebe limite maski nune'e ami haluan ami nia hatene hodi konsulta ho peritus sira hosi nasaun sira seluk iha mundu tomak. Ami senti katak loron 15 ne'e insuficiente, no Governu sei la simu hanoin diak husi sosiedade sivil no sira seluk. Ami fahe ba malu ami nia preokupasaun ne'ebe hato'ó husi Konsellu Konsultivu Fundu Petroliferu no the Core Group katak konsultasaun ne'ebe signifikativu ba asuntu kompleksu presiza tempu barak no hein katak Ministerio sei deside no loke fila fali ka habelar prosesu atu simu partisipasaun ne'ebe kompleitu liu hosi sosiedade sivil.

Mekanismu ba komunikaun ho publiku atu masimiza partisipasaun iha prosesu ne'e, inklui organization hanesan *La'ó Hamutuk* ne'ebe involve kleur ona ho ofisiais iha dezvoltamentu petroliferu iha Timor-Leste, ne'ebe dook husi suficiente. Governu publika iha *Timor Post* dala ida deit, ne'ebe susar atu to'ó ba populasaun iha Dili ne'e nia liur, no mayoridae populasaun iha sidade kapital la haree. Atu ezamina dokumentus, ema ne'ebe atu konsulta husu atu uza internet no email. Maski media komunikaun ne'e la'os obstaklu ba *La'ó Hamutuk*, maibe 99% populasaun Timor-Leste laiha asesu ba internet no email. Ami la aseita katak konsultasaun ne'ebe liu meius hirak ne'e konsidera nudar loke ba publiku ka implementa objetivu konsultasaun ne'ebe hateten "publisidade, lejitmidade no transpatante ba reorganizesaun Ministeriu iha setor petroliferu.

Ministeriu mos hatudu mal vontade atu buka partisipasaun publiku hodi fó esbosu lei iha Portuguese deit. Ita nia konstituisaun hateten katak lingua ofisial Timor-Leste mak Tetum no Portugez; Governu adopta tiha ona Inglesh no Indonesia nudar lian servisu. Partikularmente iha setor petroliferu, dokumentus barak sirkula iha Inglesh atu involve ema ne'ebe iha konhesimentu, espesialmente sira ne'ebe servisu iha kompania

mina internasional ho interese finanseiru ba ita nia rekursu. Iha tender ikus, kompania husu atu submete sira materiais tender iha Portuguese no Inglesh. Maski funsaun Governu mak atu serve povu Timor-Leste, ami haree katak atu prioritiza interese kompania hirak ne'e duke nia sidadaun.

Kuran hosi 5 % populasaun Timor-Leste ne'ebe hatene Portugez. Bainhira *La'ó Hamutuk* husu disponibilidade esbosu dekretu lei iha Inglesh, konselleiru Internasional ba Governu hateten katak Governu la tenki hasai osan ba tradusaun ba lian seluk, no nia tauk tamba ema seluk sei husu iha "verzaun Italia, Franses, Norwega, Hindi, Sina, etc."

Esbosu Lei Fundu Petroliferu no Lei Petroliferu sirkula iha lian Inglesh hanesan mos Tetum, Portugez no dala ruma iha Bahasa Indonesia. Husi duzia submisaun ne'ebe fó sai ba konsultasaun publiku husi dokumentus hirak ne'e, ida iha lian Tetum, rua iha Portugez no Inglesh, no sira seluk iha Inglesh no balun iha Bahasa Indonesia. Maski *La'ó Hamutuk* hato'o nia preokupasaun ba lei hirak ne'e tamba la'os hotu-hotu ho ideias diak ne'ebe mosu durante konsultasaun publiku, ami apresia tempu ne'ebe adekua no flesibilidade lingua ne'ebe halo ema barak ne'ebe iha konhesimentu fó sira nia analize no komentariu ba dokumentus esbosu hirak ne'e.

La'ó Hamutuk halo submisaun iha Tetum, lingua ofisial Timor-Leste ne'ebe mayoria populasaun ne'e koalia. Atu konseleiru internasional ba governu kumprende, ami fó mos tradusaun iha Inglesh.

Agora la'os tempu atu halo mudansa mayor iha strutura governu.

Ami apresia esforsu hosi Governu atu muda no regula atividade dezvoltamentu petroliferu iha Timor-Leste, inklui kriasaun dekretu lei sira. Maibe kontestu sosial no politika oras ne'e halo katak tempu salan atu halo mudansa mayor iha lei hodi tama iha kbiit.

Tratadu Tasi Timor husu Governu atu transforma TSDA ba Autoridade Regulatoris iha tinan tolu husi Abril 2003, maibe ida ne'e hanaruk tiha ona ba tinan ida no ikus mai ba fulan tolu. Ne'e bele fasil liu atu muda ba fulan 9 to Abril 2008, bainhira Parlamentu no Governu foun sei iha tempu atu estabese rasik. Kriasaun PETROTIL and Konsellu Nasional ba Politika Enerjetika la dun iha presau tempu-laiha razaun atu fó sai iha tinan ne'e nia laran.

Timor-Leste iha krize nia laran ne'ebe ho aprosimidade 10 % populasaun deslokadu husi sira nia uma no barak loron-loron moris ho tauk ba violensia. Aumenta tan, ita atu iha eleisoens Presidensial no Parlamentariu ho possibilidade muda strutura no politika ita nia Governu. Povu barak interese iha politika publika barak liu okupadu ho kampanha, ne'ebe prevene sira atu fó atensaun ba konsultasaun publiku. Tamba dekretu lei ne'e la submete atu iha aprovasaun Parlamentu atu fó sujestaun, halo sai importante liu katak konsultasaun publiku ne'e kondukta bainhira lideres politiku sira husi partidu hotu-hotu bele partisipa.

Laiha urjensia ba Timor-Leste atu kria strutura administrasaun petroliferu foun lalais hanesan ne'e, especialmente bainhira ita nia governu iha tranzisaun ida nia laran.

Hanesan mudansa iha strutura Governu iha tinan ne'e nia rohan sei fó impaktu ba desizaun politika ohin lora. Tamba ne'e bainhira lei ne'e hato'o lalais no iha kbiit molok eleisaun Parlamentariu, laiha garantia katak governu foun sei simu ne'e, bele mos iha politika diferente.

Durante krize seguransa atual, ema barak labele fó atensaun ba konsultasaun ida ne'e, ne'ebe hamenus partisipasaun publiku. Tamba ne'e, ami husu Governu labele uza instabilidade no inseguridade hodi vigora lei ka politika ne'ebe mak karik bele fó impaktu ba ema barak nia moris iha nasaun tomak nia laran.

Ne'e hatudu katak ita nia Governu no Parlamentu uza krize politika no sosial atu taka dalan hodi nune'e sira bele foti desizaun mayor bainhira atensaun povu distraidu hela. Iha fulan rua liu ba, Parlamentu vigora tiha lei pensaun ba eis membrus parlamentu no eis-titularis, ratifika tratadu CMATS, no karik atu pasa mos lei Klemensia no lei Servisu Militar. Ami espera katak saida mak akontese tiha ona la'os tamba orgaun soberanu sira uza oportunidade hosi situasaun hodi halo desizaun ne'ebe mak sei iha impaktu negativu ba futuru ita nia nasaun. Maibe maske se ida ne'e la'os sira nia intensaun, hodi tama iha vigor lejislasaun bo'ot hirak ne'e antes eleisaun no iha situasaun krize nia laran hodi ignora prinsipius demokrasia no sei la produz rezultadu masimu ba ita nia Povu.

Lei hirak ne'e fó prioridade liu ba osan ba Kompania liu fali nesicidade ita nia Povu.

Hanesan nasaun ne'ebe mak manan tiha ona independencia liu hosi luta popular, Governu Timor-Leste iha responsabilidade hodi proteje no servi Povu Timor-Leste nia futuru. Lei no regulamentu hotu-hotu ne'ebe mak tama iha vigor hosi Governu tenki refleta ida ne'e.

Infelizmente, hosi proposta dekretu lei tolu ne'e hatudu katak ignora moris ita nia Povu. Lei hirak ne'e responde liu ba nesicidade merkadu, ne'ebe mak domina ho osan no kompania mina internasional. Hanesan, konvite ba konsulta popular hato'o diretamente ba "konsumidores no agentes ekonomia" iha seitor mina, duke ba ita nia sidadaun. Maske ita nia Governu iha autoridade hodi regula prosesu dezenvolvimentu hotu (inklui politika enerjetika), prosesu ida ne'e tenke bazeia ba interese Povu Timor-Leste, la'os kompania mina ka konsumidores mina, ne'ebe mak mayoria hosi nasaun riku.

Povu Timor-Leste uza enerjia menus liu duke Estados Unidos America, Japaun, ka nasaun industria riku seluk. Agora produsaun hosi JPDA hotu-hotu esporta ba Japaun no nasaun seluk, maibe ita nia Povu tenke importa mina hosi Indonesia.

Ami espera katak agentes no politika foun fó vizaun ba dekretu lei hirak ne'e hodi haree tuir produsaun no distribusaun hodi asegura seguridade enerjia iha Timor-Leste, maibe sira mos tenke proteze ita nia meu ambiente, kuidadu ita nia comunidade no salva dereitu Povu nian ba rai. Nomos fornese rendimentu ba ema ne'ebe hatama no Governu, enerjia tenke disponivel iha Timor-Leste laran tomak ho prosesu ne'ebe baratu la estraga ita nia meu ambiente. Strutura konsulta publiku no agentes ne'ebe mak proposta hatudu katak bele ignora mayoria ita nia populasaun. Ezemplu, iha artigu 27 kona ba Autoridade Nasional Regulador Petroliferu (ARNP) esbosu dekretu lei husu audensia publiku ba asaun sira ne'ebe mak bele afeita dereitu autor ekonomia ka

konsumidores, maibe laiha buat ida iha lei hirak ne'e ne'ebe mak bele fornese audensia publiku relasaun ho atividades ne'ebe afeita diretu ita nia sidadaun.

Maske mandatu ajentes foun ne'ebe mak estabelese liu hosi esbosu dekretu lei hirak ne'e, inklui klausa kona ba protesauun meu ambiente, maibe lei ne'e laiha artigu ruma mak esplika kona ba oinsa halo ida ne'e. Liu hosi ne'e, Konsellu Nasional Politika Enerjetika la inklui representante hosi Ministeru Meu Ambiente ka ema ruma ne'ebe mak iha kunhesementu ba buat seluk duke "problema enerjia" ka negosiu. Ida ne'e reflata prioridade Governu hodi tau ekonomia petroliferu as liu iha preokupasaun hotu nia leten.

Ita nia nasaun nia enerjia tenke inklui rekursu ne'ebe mak bele hafoun no enerjia alternativu, la'os mina deit ne'ebe bele sunu no kria foer no polusaun. Ezeptu ba mina hosi ai horis sira 'biofuels', sira ne'e la bele hafoun no halo at liu mudansa iklima global. Mundu tomak depende ba rekursu enerjia aumenta ba beibeik. Timor-Leste iha riku soin barak – loron, anin, laloran, udan, tasi ne'ebe klean. Se ita nia politika enerjia dezentru hosi ema sira ne'ebe mak foka liu ba oinsa maximiza rendimentu petroliferu no sunu mina, ne'e klaru katak, ba oin—sei ignora kona ba oinsa buka alternativa, no Timor-Leste la bele ses hosi hetan risku hetan enerjia susar ne'ebe lori nasaun barak monu.

Esbosu lei sentraliza liu iha poder Ministeru ida.

Strutura ne'ebe mak proposta relasiona ona desizaun petroliferu nian sentraliza hotu iha governu, partikularmente, iha Ministru Rekursu Naturais, Mineral no Politika Enerjetika. *La'ó Hamutuk* hamosu preokupasaun ida ne'e iha ami nia submisaun ba Lei Petroliferu, ida ne'e, infelizmente, katak Ministeriu hakarak kontinua kona ba sentralizasaun. Ami hakarak iha esperansa katak mudansa demokratiku hosi ita nia lider Governu iha fulan Jullu liu ba hakarak re-informa ami nia mensazem katak interese ema nia tenke proteze ho lei ruma, duke depende ba intensaun individu ida-idak nian, ne'ebe provisoriamente kaer fiar publiku nian.

Poder sentralizasaun hanesan ne'e bele rezulta korupsaun, abusu poder, no maladministrasaun. Timor-Leste konfronta tiha ona ho problema barak tamba cek ho balansu ne'ebe oituan deit iha ita nia instituisaun. Wainhira instituisaun ne'ebe iha funsaun hanesan kontrola intituisaun publiku seluk fraku, ida ne'e sei fó posibilidades barak ba korupsaun. Konsellu Nasional Politika Enerjetika mak responsavel ba hari politika enerjetika ba ita nia nasaun, tuir konseptu hosi proposta Ministeru, ne'ebe mak preside liu fali hosi ne'e. Maibe, ami mos la klaru kona ba ema autoridade regulador iha Konsellu ida ne'e. Diagrama no esplikasaun hosi dokumentus ne'ebe fornese ba konsultasaun ida ne'e dehan katak Konsellu sei "supervisiona" ba ARNP ho poder hanesan ba sira ne'ebe mak involve iha Komisaun Konjunta tuir TSDA, maibe regulador ida ne'e no responsabilidade ne'ebe sala hatudu la inklui iha esbosu dekretu lei, ne'ebe ami le hanesan fali esplika kona ba Konsellu hanesan konsultativu ka advisor deit, ho poder proposta politika no deresaun maibe la'os obriga sira. Strutura ida ne'e sei fó poder kiik deit ba Konsellu, tamba ne'e ami espera katak Konsellu sei bele muda politika enerjetika ne'ebe mak Ministeru halo.

Proposta lei sira konbina regulasaun, produsaun no distribusaun iha Ministeru ida nia okos, ne'ebe mos responsabliza ba regula atividades ne'ebe mak sei fornese rendimentu ba Governu liu hosi 90%. Katak susar hases hosi atu hetan rendimentu hosi petroliferu

mak prioridade as liu. Hanesan ema Timor nia mota durante tempo udan, saida deit mak ida mota laran sei fase hotu wainhira udan bo'ot mai. Maibe hanesan ita nia ema presija ponte, uma, infraestrutura, estrada no portu, ita presija strutura ne'ebe mak indepedenti ne'ebe mak sei simu atensaun barak hanesan projeitu esplotasaun petroliferu. Ida ne'e so bele atinji liu hosi funsaun oi-oin – produsaun, distribusaun, regulamentu no supervisaun – sira indepedenti. Iha dalan hanesan ne'e sira bele cek malu no tendensia ba korupsaun bele prevene antes sira sai hanesan iha fatin hotu-hotu.

Ami mos preokupa kona ba PETROTIL – proposta atu iha kompania mina nasional, ne'ebe iha Ministeru hanesan nia okos ne'ebe responsabliza ba regulamentu atividades petroliferu. Oportunidade ne'ebe valor tebes ba participasaun indepedenti iha *joint ventures* ka kooperativa hamutuk ho kompania mina internasional sei lakon se PETROTIL la indepedenti hosi Ministeru. Kompania ne'ebe mak publikamente indepedente, ho supervisaun ne'ebe mak fornese hosi parte seluk hosi Governu, bele ajuda proteje kontra kollusaun entre kompania no Ministeru at iha tempo hanesan mos kuidadu segredu saida deit mak nesicita. Esbosu lei hirak ne'e la klaru kona ba regulamentus ne'ebe mak sei implementa regulamentu industria petroliferu, dezvoltamentu politika enerjetika, ka manajementu rekursu enerjia. Oinsa regulamentu sira ne'ebe sei dezvoltolve? Se mak sei hakerek? No nia nivel transparencia oinsa, sujestaun publiku, no saida deit mak sei falta?

Lei sira ne'e la fornese transparencia ka akontabilidade.

Maske Governu Timor-Leste, fó komitmentu tiha ona atu tuir principius Extractive Industry Transparency Initiative, maibe esbosu lei hirak ne'e hatudu halakon komitmentu ne'e. Menus ba generalidade ne'ebe ladun kalru kona ba 'transparencia no korporasaun diak' ne'ebe iha relasaun ho PETROTIL, konseptu ida ne'e totalmente la inklui iha proposta dekretu lei sira ne'e. Iha fulan ne'e, Autoridade Dizignada Tasi Timor komesa tiha ona implementa kona ba spiritu "Publika Saida Mak O Selu", ne'ebe mak hanesan titlu ba pagina ida iha website. Ami espera katak ida ne'e abansa ba transparencia no sei kontinua iha ARNP, maibe ne'e buat ida ne'ebe mak laiha iha proposta lei ne'ebe hanesan substancia ba mi nia esperanca. Oras ne'e dadaun, Australia nia lei no buat seluk kompania husu atu publika informasaun kona ba rendimentu no produsaun; informasaun sira hosi Santos no Woodside ne'ebe haruka ba Australia kada trimestri hanesan buat ne'ebe mak importante hodi publiku bele examina informasaun sira ne'ebe mak publika hosi Governu no BPA kona ba receitas hosi petroliferu. Infelizmente, PETROTIL sei la tama iha rekeramentu hosi publikasaun balun iha proposta lei ne'e nia okos, tamba ne'e, estraga eis Governu nia komitmentu ba transparency. Iha principius internasional ne'ebe mak establese diak tiha ona katak tenke hases an hosi koflitu de interese iha situasaun hanesan regulamentu industria petroliferu, principiu ida ne'ebe mak konsidera iha artigu 7.4 no 7.6 esbosu dekretu lei ARNP, ne'ebe mak prohibita membru Konsellu Administrativu hosi interese finansial iha atividades ne'ebe mak sira responsabliza ba hodi regula sira wainhira sira hanesan Konsellu no ba tinan ida depois sira sai hosi sira nia pozisaun. (se regulamentu hanesan ne'e aplika tiha ona ba konselleiru internasional iha setor petroliferu iha RDTL, mais u menus eis konselleiru nain rua bele halo violasaun ohin loran.) Ami deskontenti katak lei sira ne'e la la'ó luan, hodi proteze kontra konfliktu de interese iha orgaun hotu-hotu no responsabilidade ne'ebe mak sira defini. Nomos, sira tenke husu ema hotu ho posizaun iha regulaun petroliferu tenke publikamente deklara sira nia riku soin, rendimentu no konfliktu de interese ruma ne mak potensial bele mosu antes sira komesa

servisu, hanesan dalan fundamental hodi salvaguarda kontra korupsaun. Maibe, provisau sira hanesan ne'e iha Lei Fundu Petroliferu ba Conselho Konsultativu Fundu Petroliferu hetan problema barak tiha ona hodi implementa; tamba Timor-Leste seidauk iha lei hotu-hotu kona ba deklarasaun riku soin ba sira ne'ebe kaer ukun no fiar publiku nian, iha defikuldade ba membru KKFP mesak bele halo tuir hahusuk legal hosi Lei Fundu Petroliferu artigu 27.6. dala ida tan ne'e hatudu katak problema tamba ita ansi hodi tama vigora lei hirak ne'e antes Timor-Leste bele estabelese sira nia fundasaun ne'ebe forte no governasaun mak diak ho akontablidade iha Governu laran tomak. Uma ne'ebe mak harii la ho fundasaun mak forte sei monu baihira udan tau makaas iha primeiru deit.

ANRP viola prinsipus Lei Fundu Petroliferu.

Proposta lei ba ANRP viola espritu (karik mos surat) hodi Lei Fundu Petroliferu artigu 6.1 (a) ne'ebe mak lei ne'e espesifikamente dehan katak "benefisiu rendimentu, inklui redimentu tasa, Timor-Leste nian hosi Operasaun Petroliferu, inklui esplorasau, no dezvoltamentu, esplotasaun, transportasaun. Fa'an ka esporta petroliferu, no aktividade seluk ne'ebe iha relasaun ho ne'e" sei depositu direktamente iha konta Fundu Petroliferu, ne'ebe maneja hosi Banku Sentral. Maske, iha esepasaun ne'ebe mak halo iha artigu 6.1 (b) ba TSDA hanesan ajentes bi-nasional ne'ebe hari tuir Tratadu Tasi Timor, laiha razaun ba esepasaun hodi kontinua depois TSD transforma tiha ba ANRP, hanesan agensia Governu RDTL

Kompania Mina Nasional iha risku.

Iha submisaun esbosu lei petroliferu tinan rua liu ba, *La'ó Hamutuk* ho seluk proposta katak Timor-Leste estabelese kompania mina nasional, konseitu ida ke husik hela tiha hosi autor ne'ebe mak hakerek lei ne'e. ami kontenti tamba Lei Petroliferu hatama mos sujestaun sira ne'e ne'ebe mak hamosu durante konsultasaun publiku.

Maske hanesan ne'e ami kontinua apoiu konseitu kompania mina nasional katak la'os laiha risku. Hanesan esperiensia hosi Ecuador ho Nigeria demonstra, bele uza mos hanesan proteze kompania estranzeiru nia responsablidade ba sira nia hahalok ladiak, ka fó posibilidad ba sira no aktividade anti demokrasia ne'ebe mak se la hakarak koopera regulamentu internasional liu hosi estabelese – Governu diak demorativu iha nasaun sira riku. Ami preokupa kona ba proposta dekretu lei ba PETROTIL ne'ebe mak laiha buat ruma hodi proteze kontra abusos hirak ne'e.

Haree ba Timor-Leste nia esperiensia iha seitor petroliferu, no ita nia lei ne'ebe mak ladun forte hodi regula negosiu ka proteje interese publiku, ida ne'e kritiku liu katak lei sira ne'ebe mak estabelese no governa ita nia kompania mina nasional hala'o tuir prinsipus transparensia, akontablidade, governasaun diak, opiniaun independente, kontrola demokratiku, no respeita meu ambiente nomos dereitu komunidade. Infelizmente, maneira konsultasaun publiku ida ne'e, la permite ami bele halo analize ne'ebe mak klean ba esbosu statutu PETROTIL, ka fó proposta espesifiku ho hadia ka halo amandemen. Se konsultasaun ne'e bele prolonga, ami sei buka dalan hodi aprende didiak no klean liu hosi esperiensia nasaun seluk ho kompania mina nasional, ne'ebe ho diak no ladiak, no bele ajuda Timor-Leste halo liu ida ne'ebe diak liu no prevene ida ne'ebe aat liu.